

30/01/2003

Tahun yang menjanjikan kedamaian, ketenangan

SABTU ini, seluruh masyarakat Cina akan menyambut Tahun Baru. Kakitangan SKOR mengucapkan selamat Tahun Baru Cina, khususnya pembaca SKOR di seluruh negara. Seperti juga sambutan Aidilfitri, bagi masyarakat Cina yang merantau, pastinya akan pulang ke kampung halaman masing-masing untuk menyambutnya bersama keluarga dan sahabat handai.

Balik kampung pada hari kebesaran, sudah sepatutnya menjadi budaya, bukan saja bagi orang Melayu tetapi juga kaum lain termasuk Cina. Walaupun

kehidupan kita sudah begitu maju dan kaya raya, adat serta kebudayaan bangsa yang diamal sejak turun-temurun, jangan pula dilupakan.

Bagaimanapun tidak semua berpeluang pulang ke kampung halaman. Bukan saja mereka yang merantau kerana tugas, malahan bagi golongan pelajar, misalnya yang sedang menuntut di luar negara. Seperti kata Perdana Menteri, Datuk Seri Dr Mahathir Mohamad, baru-baru ini, ramai pelajar Cina negara ini berada di luar negara kerana menuntut ilmu.

Barangkali seorang daripada mereka adalah ahli keluarga anda. Bagi mereka pulang semata-mata untuk menyambut Tahun Baru bersama keluarga, tentunya memerlukan belanja besar. Lainlah bagi mereka yang menuntut di dalam negara.

Sesuai dengan nilai serta semangat Tahun kambing kali ini, masyarakat Cina percaya tahun ini akan membawa ketenangan dan kedamaian. Walaupun kepercayaan itu tidak selalunya tepat, namun itulah yang menjadi harapan setiap warga negara yang bencikan permusuhan dan ketegangan. Lebih-lebih lagi dengan perkembangan mutakhir dunia yang tidak menentu, terutama ancaman perang Amerika ke atas Iraq, yang sedikit sebanyak akan turut memberi kesan ke atas negara kita.